



## Aningaasanut Nunanullu Allanut Naalakkersuisoq

### Aningaasaqarnermut Ataatsimiititaliap suliaq nr. 01.31.06/09-00409 pillugu marlungornermi ulloq 7. april 2009-mi aalajangiinera pillugu Naalakkersuisunut ilisimatitsineq

#### **2009-mi nunaqarfinni aqutsisunut qinersinissamut partiit qineqqusaarnissaannut tapiissutinut tunngasoq**

Naalakkersuisut **inassutigaaat,**

- kontumi pingaarnermi 10.06.10-mi partiit qineqqusaarnissaannut tapiissutit aningaasaliissutaasut 421.000 kr.-inik **qaffanneqassasut**, aammalu
- kontumi pingaarnermi 20.11.50 –mi aningaasaliissutit ingerlatsinermi sillimmatit assigisaanik 421.000 kr.-inik **appartinneqassasut**.

#### **Aningaasaqarnermut Ataatsimiititaliap oqaaseqaatai**

Partii Siumut, Inuit Ataqtigiit, Atassut aamma Kattusseqatigiit Partiiat nunaqarfinni aqutsisunut 28. april 2009 qinersinissamut atatillugu qineqqusaarnissamut taperneqarnissamik Naalakkersuisut qinnuteqarfigivaat..

Inatsisartut ukiakkut 2008-mi ataatsimiinneranni nunaqarfiit ataatsimoorussanik 2009-mi aqutsisoqalissasut inaarutaasumik aatsaat aalajangerneqarnera pissutigalugu, taamaattumillu 2009-mut aningaasanut inatsimmi nunaqarfinni aqutsisunut qinersinissamut atatillugu partiinut qineqqusaarnissamut tapiissuteqarnissamut aningaasanik illuartitsisoqarsimannginnera pissutigatillugu qinnuteqaammi partiinit tunngavilersuutigineqarpoq. Pissutsit taamaannerisa kommunit suliaasaqarfiisa aaqqissuuteqqinneqarnerisa kingunerivaat, siunissamilu takkuteqqinnissaa ilimagineqanngilaq.

Taamaattumik Naalakkersuisut aalajangerput, kommuninut attuumassuteqartunut qinersisarnerit assigalugit nalinginnaasumik partiit aningaasanik taperneqassasut..

Naalakkersuisut isumaqarputtaaq, partiit qinersinissami atortussanut allanullu paasisstissiiinissamut atorneqartussanut tunngaviatigut 25.000 kr.-inik tapiiffigineqartariaqartut. Tamatumunnga naatsorsuutigineqarpoq partiit Siumut, Inuit Ataqtigiit, Atassut, Kattusseqatigiit Partiiat, Demokraatit aammalu Sorlaat Partiiat taperneqarnissaminnut qinnuteqarumaartut, 150.000 kr.-inik aningaasartuutaajumaartumik.

Naalakkersuinikkut sulinermut aningaasatigut tapiissuteqartarnej pillugu Inatsisartut

inatsisaat nr. 1, 31. maj 2001-imeersumi § 6 tunngavigalugu qinersinissaq sioqqullugu naalakkersuinikkut sulinermut peqataanermut aningaasartuutit matussutissaannut aningaasatigut tapiissuteqartoqarsinnaasoq Naalakkersuisut ataatsimiititaliap tapersersinnaavai. Ilutigisaanik Aningaasaqarnermut Ataatsimiititaliamit erseqqissarneqassaaq, Inatsisartut inatsisaanni tassani § 6, imm. 2-mi aalajangersarneqarmat partiinut partiillu avataatigut qinigassanngortittunut tapiissutit aningaasat inatsisaanni aalajangerneqartassasut.

Nunaqarfinni aqutsisunut qinersinissamut aningaasanik immikkoortitsisoqassasoq 2009-mi aningaasanut inatsisissatut siunnersuutip suliarineqarnerani Aningaasaqarnermut Ataatsimiititaliamit Naalakkersuisunut eqqaasitsissutigineqarpoq. Tamanna tunngavigalugu Naalakkersuisut allannguutissatut siunnersuummik saqqummiussippot Inatsisartunit akuersisutigineqartumik.

Taamaammat suliamik matuminnga Naalakkersuisut isumaginninnerat assut naammaginngikkini Aningaasaqarnermut Ataatsimiititaliap oqaatigissavaa. Ilassutitut aningaasaliisogarnissaanik qinnuteqaatit siumut naatsorsuutigineqarsinnaannginnissaanik missingersuusiornermut inatsimmi piumasaqaatinut tamanna naapertuuttuunngitsoq ataatsimiititaliaq isumaqarpoq. Taamatuttaaq suliani taama ilusilinni maleruagassat atuuttut malinnegarnissaat Naalakkersuisunut ataatsimiititaliap sakkortuumik inassutigissavaa.

Tamatumali peqatigisaanik nunaqarfinni aqutsisunut qinersinissap qanittukkut pisussap pitsaanerpaamik ingerlanneqarnissaata qulakkeerneqarnissaa pisariaqartoq Aningaasaqarnermut Ataatsimiititaliami amerlanerussuteqartut Atassummeersut, Siumumeersut Inuit Ataqtigiinneersullu oqaatigissavaat.

Ataatsimiititaliami ikinnerussuteqartoq Demokraatineersoq isumaqarpoq suliami pineqartoq tassaanngitsoq siumut naatsorsuutigineqareersinnaanngitsumik aningaasartuuteqarneq tassaallunili tassanngaannaq aqqiisariaqalerneq. Inatsisartuni partiit malittarisassat malinnagit aningaasanik atuinerat innuttaasunut oqariartuutaasoq naapertuuttinngitsoq Demokraatineersoq isumaqarpoq. Tamatuma saniatigut aningaasat suliassaqarfinni allani pisariaqartinneqartut aammalu aningaasat qinnutigineqartut taama amerlanngitsigisut partiit nammineq aningaasartuutigissallugit akissaqartittariaqaraat Demokraatineersoq isumaqarpoq. Demokraatit nunatsinni inatsisit malikkumavaat, taamaattumillu Naalakkersuisut qinnuteqaataat akuersaarsinnaanagu.

**Aningaasaqarnermut Ataatsimiititaliap aalajangiinera**

Siuliani allassimasutut oqaaseqaateqarlutik Naalakkersuisut inassuteqaataat Aningaasaqarnermut Ataatsimiititaliami amerlanerussuteqartunit Atassummeersunit, Siumumeersunit Inuit Ataqtigiinneersunillu **akuersissutigineqarput**.

Siuliani allassimasutut oqaaseqaateqarluni Naalakkersuisut inassuteqaataat Aningaasaqarnermut Ataatsimiititaliami ikinnerussuteqartumit Demokraatineersumit **akuerineqarsinnaanngillat**.

Inussiarnersumik inuulluaqqusillunga

Augusta Salling  
Aningaasaqarnermut Ataatsimiititaliap siulittaasua